

中国文献珍本丛书

晚清珍稀期刊续编 (二十三)

全国图书馆文献缩微复制中心

清
议
报
全
编

第五集外論彙譯

論外國
通論

清議報全編

橫濱新民社輯印

敬啟者

敬啟者

敬啟者

清議報全編卷十九

第五集中

外論彙譯三

論外國

論日本陸軍

日本西報

考日本常備陸軍一大隊據日本面尼治報所論謂日本第二次依圖聚會定議太平時常備陸軍十五萬人開戰時豫備陸軍五十四萬人政府曾將其籌兵用意對衆宣說云日本豫備陸軍之多蓋非獨自衛也如徒自衛則內變耳外患耳以爲防守亦何須如是之多乎蓋其中有故焉自甲午一役後日本遂獨立于東亞中而支那與高麗至今尙無維新之機欲維持東方太平之局惟在保護此二國而已日本今日太平時常備陸軍十五萬人戰時豫備五十四萬人者乃至少必需之數也觀日政府所說欲以此常備之一大隊陸軍不獨可以自衛并可以保護支那高麗者恐未必然夫東方時局險要之處全在中國之北京欲得極大權力必在北京咽喉之地占一要區駐重兵以守之此一著英俄德皆視爲極要之圖故俄據旅大英占威海德領膠州俄英更派武員以訓練清兵倘遇禍亂不必稽延時日遠調本國之兵即可以此爲抵敵兵法先發制人殆謂此也而日本屯此一大陸軍于本國徒糜餉項以重民困又非得要害以占人先且大言自矜曰保東方太平之局誰其信之北

京一旦難作。爲間計程幾日。可以調此陸軍乎。即以現時而論。第一兵到中國。鐵路未成。則諸多阻礙。第二運載兵糧之船甚少。第三兵器馬匹皆不足用。即使鐵路已成。船隻兵馬皆已敷用。而此大隊陸軍者。當有事之秋。用戰艦護衛。直抵中國海濱。惟俄之旅順陸軍。英之威海陸軍。德之膠州陸軍。及英法兩國之戰艦。聚於東方者。堅如壁壘。爲問日本陸軍。將何以踰越登陸。得達于北京乎。即能入海灣以登陸。亦須數禮拜之久。方抵北京。計其兵到之日。北京大事已定。則日本之兵。又將奚爲乎。然若當中日開戰之後。則此隊陸軍。尙可有爲。今時會變遷。與前迥異。日本欲決定東方未了之事。維持東方太平之局。不當轉而變計哉。吾今且爲進一策。曰。先擇北京險要之地。爲屯駐陸軍之所。與中國政府商允。派武員以操練清兵。乃能著手。倘日本無此膽量。照議舉行。是徒養此一大隊陸軍。虛耗國民租稅。且于大局未必有裨。甚無謂也。然若得中國政府允肯。依上所議而行。則日本可減陸軍一半之力。其餘尙足以自衛也。

論美據非島之非

日本西報

日本報嘗曰。我國人觀非律賓情形。逐一細察之。實以其人而自治其人。較愈于歸美國管轄也。夫非島商務之盛。物產之多。日人之垂涎。已蓄之二百年之久。今歸美人宇下。蓋大失所望矣。其報又云。倘美人既據非律賓。將來我國於南洋一帶。所有舉動。將爲美人所阻礙。

此等語我輩讀之鮮不驚爲詫異。今試將其所論者錄於下。

其說云。美人之據非島。其所失甚大。且于德行上亦大損。蓋美爲民主之國。既據非島。將來所施政策。必與其宗旨大相悖馳。且其自由之論。嘗謂凡人生於天地間。皆當平等。吾度其待非島。必不如其自待。此一語現時已先違之矣。且其政府所有之權力。乃平民所歸讓者耳。他日其民必曰。美國既自居于民主。而于非島之人。又非一律管轄。將自由平等之謂何矣。夫以人之同生于叢衆之中。皆圓顙方趾。戴天履地。無彼高此下之別。無彼貴此賤之分。此其自由之言。實可尊可貴。今美人蓋全失之矣。且其謬常云。五洲萬國。治亂得失。我美人全不干預。此策蓋保守百五十年。藉以享太平富貴之樂。誇張亦已如是之久。今何如乎。觀非律賓及其附近各島。其政治之變幻。如雲霞蓋天。將有大風拆劈之勢。不久即飛沙走石而起。今美國既爲非島之主。自必立意以與俄德法相抵拒。從來美人本不需此政策。惟東方大局。現未了期。則設法以爲底定。自不容已。且美國在東半球。而據如此之屬島。於東方事勢。正不能不一關心。如前之安享太平矣。吾見其不久即于政治擾攘之中。挺身而起。冒險以與外國開仗。夫開仗須增廣軍務。卒之軍務勢力既厚。則美國亦爲一法國焉矣。夫美國之得非島。爲各國所目擊。將來必至失信于各國。當其與西班牙開仗時也。謂此一戰不關要害。必不至兵連禍結。至爲一大戰爭之勢。故美國如據非律賓。必失望于其與國。

與其與國成爲仇敵而後已。既爲仇敵。則其與國必怨美之不信。將羣起而攻之。其攻之也。實出于公道。夫美國本一郵治之邦。爲各國所仰望。今如此。則其聲名將掃地。殊爲可痛。以上所言。皆足損美國之德行。而美人知進不知退。則失德之事。固所抵受而不能解免也。日本各報。嘗論美人之据菲律賓。其所糜之軍費等項。甚覺得不償失。蓋謂其當增設水陸軍以保太平。否則島人必起而畔亂。今雖各武員多主分兵守衛之說。然派兵非及二萬。不足以資調遣。如此。則每年需餉必及十兆元。此實照最下之數計之。而一切官員薪俸。通報往來消息。運送軍糧。築砲壘。建兵房。諸費皆未入算。況其餘雜用。必年增一年。不能豫算。試言水師。夫菲律賓海島也。若言守禦。必要大增太平洋戰艦之勢力。以爭東亞海權。如此。則所需經費。亦不下十兆元。而製造船械經費。尙不在內。除經營水陸軍費外。築造鐵路。所費仍屬不貲。總及三十兆元。乃云足用。計菲律賓島。每年所出。總不出五兆元之數。除算年需津款二十五兆元可知矣。夫以美人無端而割取人地。其失德既如此。而津貼用度。其失財又如彼。美人之有識者。不勝感歎。無如國內仍多輕薄夸大之徒。欲國家之關地。以戰勝西班牙爲榮。政府誤聽此種夢囈之談。輒以沒入此島爲大有益。故美國曾遣委員。往法京巴黎太平會議。論此事。其會長已允補銀二十兆元與西班牙。認非島永歸美國管轄。并議將來之治非島。不以美國之法律治之云。此議若確。惟望其永無改議而已。

法民自苦爲兵

日本太晤士報

錄美國門滔利阿路報云。查法國人數每年及二十歲者約三十萬人。除體弱廢疾及例應免兵役之人。餘俱列入軍籍。雖欲輸金求免。例實不能。統法國人數計之。大約四人即有一人出而當兵。夫國家養兵。必取足于本國之民者。謂可藉其各矢忠忱。以衛社稷。然法本民主國也。而人民常厭於兵。此必有其故矣。

德國與法境相鄰。僅隔一禮吳河耳。乃其人民。每言及軍事。輒喜形於色。故常有少年人例應入伍者。旁人莫不勸駕。且勉其終身以圖戰功。蓋出法人之好武。而國家又待之厚善也。至法國人民之爲兵。多非所願。然有念師丹之恥。欲爲其父兄報仇者。亦多能舍身入行伍中。然既募軍營。又常不免愁怨之聲焉。蓋法兵常追論拿破侖第一時。所布軍令寬賒。刑賞得當。凡從其役者。無非爲求功名計。今則不然。故兵士每追譽昔時。聊以自解其憤悶耳。推原其由。皆因法國俸餉微薄。軍令太嚴。操演之餘。復驅兵民以供雜役。飲食又粗惡。即營中小弁。亦極受上官之苛虐。以視昔日拿破侖之與士卒同甘苦。誠有天淵之隔。夫養民爲兵。欲其盡忠爲國。而軍法一壞。即有以生厭惡之心。行伍將不可用矣。

欲觀法國軍營之情形。莫如看法國之笑話報。其中逐款演明。最爲詳細。夫法國繁富之國也。人人皆可謀生。其不欲棄離家族。以遠去從軍。情也。今不辨貧富。盡奪其向學操業之勤。

兄弟家人之樂。而驅使爲兵。迨既入兵籍。則飲食衣服起居。一切皆淪於極賤。自縫綴衣服。尙要手自爲之。無一時可以自娛。早晚之間。長官時至巡察。不得稍放。即間有營弁到來。亦能以禮相待。惟不常耳。

統查法國每年隸入兵籍之人。約有三分之一。係屬小康之家。有三分之一。係屬村野貧窮少年。及工藝之輩。又三分之一。係屬農商家子。或善筆札之人。及方在學堂操業者。此輩少年之人。正多望其有爲於異日。而遽使之從軍。必多失學之人。然國家既立有此法。凡少年人須知無才不能免役。應早自爲計。勉成學業。庶或免歸營也。然以法國抽擇兵役之例。考之。仍以農商家子弟等爲多。夫人年近二十前後三四年間。正學問之時。若從軍三年後始復業。不免老其歲月。勤苦難成。是舉國中學問工業人等。皆因軍事之阻抑。使不能速成矣。法國人民凡隸兵籍者。額當三年。如民間子弟。係屬應入兵籍之年。除現在大學堂肄業者。考試領有文憑。方準減免年限。如在學堂考試能中選者。雖牧師之徒。寡婦之子。隨後入營。仍當補足三年之額。以符定例。

至於富家子弟。有入營者。欲求自便。往往用錢籌法。以避免軍法之苛毒。如營伴有貧者。則將錢與之。使其服侍於己。且法軍薪餉既薄。故兵民常有在營中另謀操作。以冀獲利。蓋不如是。則無以供雜費。且以供奉各小營官也。

嘗有法國富家子名士覓惹路包地者。性本浮浪。置身營中。常任十餘人自供使喚。至營中武弁。亦有貪其多資。聽其指使。遂至公私各事。多請人代勞。日遊蕩於酒店茶館之間。每於夜間告假出外。晨起回營。赴長官看驗。卒以此勞動過甚。成疾而死。有某報論之。謂軍中有此等人。實足爲軍營之害。

美國現今之陸軍餉額。每名月給十三元。所有衣裝飲食各雜用。均爲國家給發。至第三年。則每名月加給餉銀一元。英國陸軍餉額。每名月給銀一磅。衣裝飲食等費。亦歸國家給發。英美待兵民如此之厚。故英美二國民。常有自請爲兵。法國則自抽選強押而來。非甘心爲之者。無怪不及二國之兵也。然則法兵今日尙稱可用者。其在誓報德仇之一念乎。

論列強構兵之禍

日本西報

自俄國倡行萬國弭兵會。東西各邦。議論譙起。有西人名士別者。在英國聖占士大會堂演說弭兵會事。其言云。

三十年前。舉歐洲各國每年水陸軍總費。共金一百二十兆磅。當太平時。各國整頓軍費。糜耗如此鉅款。是時人人已爲之婉惜。今每年竟耗費至二百三十兆磅金。三十年之久。幾增至兩倍之多。英國三十年前。每年所需二十四兆。已足防禦。今每年用四十二兆磅。尙不足用。在千八百九十四年。柯羅士比利大員。代英政府向俄政府條陳息兵及禁造軍器之

議當時俄政府聞之深違其言。惟適遇中日構釁。其事遂沮。故歐洲每年虧耗。比之一千八百九十四年條陳時。增多二十七兆。倘當時柯羅士比利之計得行。歐洲各國軍費。不至虧耗如此之鉅也。

諸君皆知僕遍遊歐洲。回國不久。當路經俄國時。得晤俄皇面談一切。予觀俄皇之爲人。性尙武。息兵非其本心也。俄太平時有九十萬兵。爭仗時有七兆兵。地跨歐亞兩洲。俄皇一言一動。關係甚重。故世人嘗謂俄皇握此大權。凡所作爲。無不可任意爲之。予曾將息兵一事。與之商榷。今將其答予之言。爲諸君述之。

俄皇曰。予遍觀全球。今之所稱爲文明有教化之國。未盡稱意。凡地方未經歐洲統轄者。歐洲各國虎視眈眈。皆欲爭奪而有之。予觀此情形。實非盡利。如以各國所占據之地論之。其土人多嗜鴉片。耽烈酒。至增百病。治地之人及受治之人。界限分明。又重抽其稅。以酬教化之報。至若得地之國。又徒生疑忌。以各相仇視。故必大增水陸軍備。以爲守禦之計。水陸軍備既增設。則虧耗愈多。其虧耗之資。本太平時人民所得享者。而擲諸無用。故上者擁有鉅資。享富厚者甚鮮。其下者貧民愈多。是以貧富貴賤。界限相越。人類遂多缺憾矣。此世界中。所以有無窮之禍亂也。予所以不稱意者此也。

雖然予既知之。何爲而不能免也。以今時勢論之。各國慘淡經營。整頓軍備。以陸軍而論。須

擇精悍者乃募入營。倘遇開仗。其必互有傷殘。可知戰務費用之鉅。以一國計。爭戰日久。其國帑未有不耗竭者。現在各國講求軍械。靡不精良。其武員之死于兵器必多矣。以今日戰務論。有數害。一殺傷人類之害。二耗損國庫之害。三殘戮官員之害。雖戰仗既勝。以予觀之。亦不過亂世之民賊而已。衆人聆畢。同聲稱善而罷。

論太平洋之未來與日本國策

日本商業世界報

自本世紀之初。列強相追相逐。其地位日接近於太平洋上。今已有肩摩轂擊之狀。將來殆至于握手接吻而未有已也。然則太平洋之未來。於政事商業宗教學術。凡人種增進。及其爭奪之事。關係不小。而將爲萬國民之大戰場。殆不容疑也。及於彼時。則其動機所起。有二個之現象。一曰科學之進步。二曰列強之均勢是也。

近者科學之進步。縮地球而小之。能使此國與彼風馬牛不相及者。今則愈相接近。大有變人間世界成縮本之勢。距今三十年前。法人列士布開直徑百英里之蘇彝士河。通地中海之潮于紅海。而西比利亞之鐵道。使東半球之地球頓爾緊縮。尼加拉瓦之運河。使西半球之地球頓加緊縮。而太平洋海底之電線。希馬拉耶橫貫之鐵道。與各國紛紛獎勵兩洋之航海業。近者步武益進。遂使淼渺重洋。殆如一葦。大地球化爲小地球。因之人種之親近。國土之緊接。乃當然之結果也。然惟因其相親近相緊接。智力有優劣。國力有強弱。而物競天

擇優勝劣敗之公例出焉。英國之蠶食印度、占領香港、掠新加坡等埠，法國亦併吞安南一帶。於是昔者大西洋爭奪之戰場，轉瞬移于太平洋矣。

列強權力既伸于太平洋，英法以外之強國，見英法占地于東海，失均權之利益，然進之不能禁，英法使撤回其侵地，退之又不能坐視，讓兩國之獨占。於是悉心經營，殆非一日。法國乃猝然奪膠州，爲海軍之根據地；俄國次欲旅順、大連之兩港，使其西比利亞鐵道得達于浦港及大連，猶進而深入于南滿洲之地；美國既合併檀香山，馳騁于太平洋上，更與西班牙戰奪菲律賓羣島，殆將卓立于太平洋之中心點。法國有買收拉多龍諸島之說，意大利有要求三門灣之說，其他英之垂涎楊子江沿岸及舟山島，法之屬望南清一帶之地，德之對于山東全省，俄之對于北清，一一回想，但覺歐美之強國，皆輪送其境土，遠來于太平洋沿岸，故可謂之爲東洋之英國、東洋之法國、太平洋上之俄國、美國、德國、意國等。皆次第出現，遠太平洋化爲近太平洋，西洋諸國變爲東洋諸國矣。諺曰：去者日以疏，今當反而言之曰：近者日以繁。嗚呼！太平洋之前途，既多可望，復多可危也。

然則我日本國民當于此時，豈可袖手傍觀哉？或主瓜分支那，或主收掠福建省，或主四國商業聯盟，或主清國開放，或主保全扶植支那，而唱亞細亞萬歲。其他或云帝國主義，或云侵略主義，或云平和主義，蓋東亞問題之解釋，殆如雨後之松茸矣。

雖然以吾輩見之以上諸論到底不免近視眼的政策耳何也。據物競天擇優勝劣敗之公理。亞細亞者終不能據爲亞細亞人之所獨有。視爲此外之桃源。今者當進步競爭侵略。利己優勝劣敗之時代。雖經哲學者道德學者社會學者經濟學者多方設法。欲遏其橫流。而世界之大勢。滔滔而趨動于強者指揮之下。終不可抑。然則今日於支那問題以外。其背後尙有一太平洋之大問題。其于我日本之將來利害所關。更爲重大。於政治上。于商業上。我日本將爲世界之大日本乎。抑爲東隅之小日本乎。皆將于此大問題以定之。而支那問題。不過其內所含之一小問題耳。

然則我日本人士。刻下當講究者如何。則經營太平洋是已。惟水能生文明。惟文明能利用水。而太平洋則水之最大者也。能利用之者。豈非世界最大之文明國哉。今我日本幸而所位之地。有可以利用此最大水之形勢。至其能利用與否。則惟在人爲耳。

中古之時。意大利之都府。占天下形勝之地。握地中海之權。商業日隆。南歐政權。遂歸掌握。葡萄牙。荷蘭。起奪其海權。于是商權政權亦去彼移此。英國出破荷蘭。大西洋之海權。忽歸英手。商權亦遂爲其獨占。至今霸天下。此已然之事也。然則他日握太平洋之政權者。即世界之必在商權海權最優之國無疑矣。雖然。太平洋今已非黃種人之太平洋矣。故今日欲握太平洋之霸權。不可不與白種顏相敵又明矣。白種之智識。于我爲先師。我目輸他一着。然

于自然之地位、我踞其形勝、故苟能利用之、則未始不可相抵、利用者何、舉日本全土為太平洋上經過之貿易地是也、

以全國為貿易經行地之策、於政治上為平和主義、而非侵畧主義也、為積極主義、而非消極主義也、所謂無花而得實之策也、舉森渺無際之太平洋岸上、凡洋島之各色人種、各色產物、各色風土、打為一丸、自南自北、自東自西、所有輸運的貨物、悉朝宗于日本、復由日本而分布于四方、所謂商國主義、平和積極主義、無以過此也、外之支那問題、亞細亞問題、因之可以斷定、內之貿易政策、自由保護兩者之孰當、內外人平等之主義、可行與否、修築港灣獎勵航海之事、當急行與否、海軍擴張之程度、當如何、凡此諸問題、皆可一言而決矣、今將太平洋上貿易總額畧列如左、

(甲) 太平洋面美洲諸國

	(輸入)	(輸出)	(合計)
智利	一二、〇〇〇、〇〇〇 磅	一二、五〇〇、〇〇〇	二四、五〇〇、〇〇〇 磅
玻利比亞	一、〇〇〇、〇〇〇	三、〇〇〇、〇〇〇	四、〇〇〇、〇〇〇
秘魯	二、〇〇〇、〇〇〇	三、〇〇〇、〇〇〇	五、〇〇〇、〇〇〇
埃及德兒	一、五〇〇、〇〇〇	二、〇〇〇、〇〇〇	三、五〇〇、〇〇〇
哥倫布及中亞美利加	一、〇〇〇、〇〇〇	二、〇〇〇、〇〇〇	三、〇〇〇、〇〇〇